

辛壬春秋

王士珍題



肆

西康古康藏衛三區之一

西康爲川滇屏障經趙季和七載經營卽建省矣因革命

而功敗垂成前此無人道及文特表而出之且加詳焉是吾國西南極有關係大文字書中別具一幅精神

國人不講

輿圖知有藏不知有康一出打箭爐卽云進藏國家于

藏設辦事大臣於康則否至光緒三十二年始創設督

辦川滇邊務大臣康居川滇之間故名川滇邊務若曰

此藏地之鄰于川滇者耳仍不以駐康名則執政者之

謬也敘事之文間以辨駁在書中別具一幅精神

地名不正中國人士恆視

康藏爲一于是藏人受外人煽惑藉端兼併其實康地

東自打箭爐起西訖丹達山止三千餘里南與雲南之

維西中甸兩廳接壤北踰俄洛色達野番與甘肅西甯接壤更四千餘里其西南隅踰雜瑜經野番境數日程卽爲英屬幅員遼濶倍於川等於藏歷代不知經營將地界于原有土司而自治者十之五畀于呼圖克圖者十之一流爲野番者十之三由清廷賚予西藏者十之一江十貢覺桑昂雜瑜瞻一對皆後先賞給西藏以數千里之地界限混淆藏旣不全有清雖有羈縻之名然祇於打箭爐設同知裏塘巴塘察木多設糧員外雖設副將遊擊都司守備等武官但供給官差過往衛護驛站行旅而已至各地番民之治理任土司及呼圖克圖並堪布橫徵暴歛慘無

人理中國不過問也其酋長之雄黠者或蠶食各部併其地役其民淫昏凶虐頑梗自大中國亦不過問也不諳其俗故弗理其政不征其稅亦不利其土莽莽喫區視若甌脫

指陳形勢剖析原委如數指上螺紋置之歐史文中幾無以辯

光緒三十一年

年駐藏幫辦大臣鳳全由川赴藏道經巴塘察其土地膏腴卽招漢人開墾番人以神山不可動出而阻撓鳳全不聽於茨黎隴築墾場委巴塘糧員吳錫珍都司吳以忠經紀其事番人愈疑阻巴塘正土司羅進寶及堪布知眾怒難犯勸鳳全速行鳳全詈之番人遂羣起逐鳳全漢兵寡不敵眾吳以忠陣亡鳳全逃入正土司寨

內與番人議和。番人詐許。迫鳳全回川。鳳全東行至鸚哥嘴。伏起官兵同及於難川。督錫良奏派提督馬維騏建昌道趙爾豐督兵征之。爾豐經營西康自此始。特筆明點明以爲前半篇綱領

六月克巴塘。誅正土司羅進寶副土司郭隆宗保。及首惡之堪布喇嘛數人。嗣以糧運不濟。維騏回川。留爾豐善後。九月爾豐復率師剿滅倡亂之七村溝。並搜擒各處餘匪。遷正副土司之家族于成都。給以奉養。巴塘底定。十月遣道員傅嵩林查戶口定糧賦。十一月遣員赴鹽井。榷鹽稅。西康部落以巴塘爲最繁盛地方。千餘里而與巴塘相接者。裏塘也。在巴塘東亦土司。

制初裏塘屬地鄉城喇嘛普中扎娃强悍知兵叛土司獨立至光緒二十年復誘殺裏塘守備李朝富父子川督鹿傳霖遣遊擊施文明率兵攻之爲番人所敗文明被擒剝皮實草以爲歲時逐崇之具及爾豐赴巴塘路過裏塘雇用烏拉運糧烏拉者番人支差之名而正土司四郎占兌乃巴塘正土司之妻私生子故約副土司禁頭人給烏拉由是糧餉不能轉運爾豐乃殺其頭人拘禁正副土司糧乃運行爾豐赴巴塘令糧員查騫仍拘禁正土司勒令續雇烏拉未幾正土司殺守卒逃往稻壩貢噶嶺嘯聚爲亂爾豐旣定巴塘移師攻鄉城並

分兵剿稻壩賊。正土司敗逃入藏。稻壩平而鄉城攻兩月不下。三十二年正月爾豐復親率大兵督攻大小數十戰番眾乃退而喇嘛寺碉堡堅實大砲不能入乃斷其水道以圍困之數月官兵乏食至煮包米牛皮以爲糧。閏四月番人以無水故普中扎娃自縊死遣人持遺書繩城求外援且約期開城走書爲邏卒所得設伏待之至期賊果出擊殺數百人生擒百餘人殺首惡數人餘均投誠釋放番人聞之皆降服鄉城亦平裏塘全境皆定國家之恥遂雪焉八月授趙爾豐爲督辦川滇邊務大臣爾豐首奏請以巴塘裏塘改土歸流並馳歸成

都與川督錫良滇督丁振鐸議籌西康用款十二月鹽  
井臘翁寺爲亂爾豐電飭防兵攻克之三十三年正月  
春詔爾豐護理四川總督兼督辦邊務爾豐卽修建關  
外旅店招募農民開墾奏遣吳嘉謨辦學務聘美人勘  
金礦創製革廠於巴塘建鋼橋於河口並延曰本農技  
師提倡農業遣員出洋購織絨磨麵各機器分遣醫生  
購藥餌出關設局奏設裏化縣定鄉縣於裏塘巴安縣  
於巴塘凡西康應興應革諸大端次第陳奏允行復由  
部撥開辦經費銀壹百萬兩西康規模粗具三十四年  
正月詔授爾豐爲駐藏大臣兼邊務大臣七月復與川

督趙爾巽奏設康安道改打箭鑪爲康定府設河口縣  
裏化廳同知稻成縣貢噶嶺縣丞巴安府三霸廳通判  
鹽井縣並招募西軍三營挑選旗兵八月爾豐率之西  
行而德格土司適亂德格在巴塘北金沙江上游地方  
數千里其土司係宣慰司職譜牒相傳已四十七代光  
緒二十年川督鹿傳霖派兵攻瞻對改流而統兵官張  
繼思啟封疆圖德格德格土司羅追彭錯有子曰多吉  
僧格後羅追彭錯與民女通其妻至米者登仁甲妬之  
遂與頭人通私生子名降白仁青由是夫妻反目妻故  
藏女與瞻對藏官有連藏官助抗其夫各挾其子分居

兩地張繼乘畔與土司言爲遂其婦及降白仁青乃率  
兵入德格。據土司夫婦至成都。鹿傳霖奏與瞻對同改  
流後駐藏大臣文海成都將軍恭壽劾傳霖翻瞻對案  
德格亦與焉。土司夫婦得省釋。旋皆病故。傳霖遣其二  
子回籍。朝廷允以多吉僧格暫管地方。承襲土職。後降  
白仁青爭土司。多吉僧格遂奔藏。娶妻妾欲不歸矣。而  
德格頭人百姓以降白仁青。非羅追彭錯子。且殘暴不  
願戴之。赴藏迎多吉僧格歸。擁爲土司。降白仁青以民  
不附已。已退讓既數年矣。而頭人正巴阿登等樹黨營  
私。復嗾其爭職。並誘奪多吉僧格妾。多吉僧格夫婦復

奔藏控于駐藏大臣有泰張蔭棠不得要領德格百姓復迎之歸且擒降白仁青禁錮之降白仁青越獄逃因復爲亂多吉僧格避匿民家財貨被掠皆盡會爾豐出關多吉僧格卽遣人赴打箭鑪呈控爾豐卽率兵往剿十一月抵更慶十二月攻賊于贈科賊竄雜渠卡時雪深草枯烏拉難行官兵不能追賊復猖獗宣統元年正月瞻對藏官調兵來犯遣道員傅嵩燧扼之于昌泰爾豐奏請銷去駐藏大臣專任邊事詔允之四月爾豐親督兵赴雜渠卡敗賊于麻木北遁千餘里至卡納沙漠官兵追十日及之斃其魁餘眾投降降白仁青亦竄入

藏德格乃平多吉僧格夫婦泣請爾豐改土歸流爾豐  
許仍襲土職多吉僧格以土廣人稀窺伺者眾與其不  
保于將來何若早圖于今日爾豐從其請奏改多吉僧  
格宣慰司職爲花翎二品頂戴都司世襲年給養贍銀  
三千兩分其地爲五區中區曰德化州南區曰白玉州  
北區曰登科府極北一區曰石渠縣西區曰同普縣東  
區之絨壩擦暫附中區而德格北之俄洛色達兩野番  
亦聞風來附俄洛色達地延袤數千里西北直達西宁  
爾豐復奏設邊北道缺於登科以資控馭焉附德格境  
內有三小土司曰春科人口不及百戶土司官絕無嗣

由藏派春科寺喇嘛爲堪布治其民徵其賦至是爾豐逐堪布改流曰高曰人口百餘戶耕牧于登科金沙江及雜渠卡雅龍江之邊其土司印信久爲藏官堪布奪去收爲藏有至是爾豐勒堪布繳印驅之回藏併其地于登科府石渠縣分領之與土司以都司世職曰靈葱人民數百戶地僅數村有郎吉嶺一村土司曾施與德格之巴邦寺喇嘛復欲收其地屢經械鬥適爾豐至登科巴邦寺控于行轅爾豐判令土司還所劫郎吉村牛馬改流歸登科府德格全境皆定德格分兩層叙與前巴塘裏塘文法相配爾豐卽奏設收支局定賦稅鑄銅元出關行使八月爾

豐渡金沙江至春科巡閱十月回德格更慶適川兵入藏藏人梗阻于察木多西境劫軍糧擄官兵爾豐聞警復率邊軍兼程進經崗沱渡金沙江由林同普越雪山抵察木多護川兵入藏三十九族者地與西甯相連原百餘族數十族歸西甯三十九族歸駐藏大臣然地非藏境族人不願屬之爾豐駐德格時族人慕爾豐威德來投至是復來請爾豐卽奏歸管轄議設官八宿者在察木多西歸呼圖克圖治理聞爾豐待番人有恩信僧俗頭人來謁請歸流設官爾豐並允之過八宿西卽丹達山矣爲康藏分界處有四部落焉附丹達山東麓

者曰類伍齊曰搬碩多曰洛隆宗曰邊壩與藏境毘連  
清時嘗賚予藏人四部落地當入藏孔道故于搬碩多  
邊壩等處駐千總把總外委等官護守驛站川兵之入  
藏阻我者卽四部落也川兵繞道由三十九族入藏爾  
豐卽督軍向大道轉戰前進四部落皆敗潰投誠且爲  
我兵購運糧秣時隆冬雪深草枯牛馬乏食倒斃甚眾  
爾豐憐之遣察木多糧員劉廷灝携資賑卹番民大悅  
而駐藏大臣聯豫聞邊兵收服四部落卽遣員駐搬碩  
多充理事竟據爲轄境於國家籌邊遠畧及爾豐力征  
經營苦心茫然莫解也文氣悠揚委婉歎歎唱歎有弦外之音爾豐旣定

類碩落邊四部落卽分兵取江卡貢覺桑昂雜瑜各部  
江卡貢覺者蒙古人種土人尙存元代蒙文制誥桑昂  
雜瑜皆野番投誠者清初川兵入藏多取道於桑昂設  
有台站後乃併歸乍了雜瑜之外尙有野番與英屬接  
界合四部落地廣袤千餘里南與雲南怒江接北與三  
巖乍了接東與巴塘鹽井接西與察木多波密八宿接  
清時亦賞給藏人於江卡設守備等官護驛站而藏官  
徵其糧賦川兵之入藏初由江卡藏官調土兵阻之乃  
改道由德格察木多以避江卡之藏兵時邊軍爲前驅  
越丹達山直抵江達而江卡藏兵數千人卽欲乘虛犯

巴塘勢張甚爾豐分兵擊之藏兵潰散二年春爾豐疏請收回其地並請與藏人劃界於江達而聯豫迭爲藏人爭仍還其地爾豐乃招集頭人百姓詢願歸何屬僉以藏官虐願歸流爾豐卽爲設官治理之於是江卡貢覺桑昂雜瑜四區卒爲國有不屬藏人四月爾豐與川督趙爾巽奏設邊北道登科府德化州白玉州同普縣石渠縣五月邊軍自江達回察木多六月爾豐率兵赴乍了乍了與察木多相連兩地共千有餘里皆受治於呼圖克圖亦清初所賚予爾豐旣至卽宣布呼圖克圖橫征暴斂狀勒令改定番人悅服並設官爲理詞訟初